



Selasa, 12 Desember 2023

Ogen: Juna 4:4



Bujur Kin Kam Merawa?



Kalak si rembang Tengah rukur, ngasup kal ia ertimbang arah apai pe. Bagi kalak si beda pendapat, la siangkan, si rubati, natap angka 6 arah ia tedis, arah lepar ngataken angka 9, e maka adi sikengen banci rubati. Adi la ngasup kita ncibalken dirinta i bas situasi kalak sideban labo kita siangkan. Ukurta, sura-sura ras pengertinta ngenca si pebelin sikedungenna mpeturah nembah ate ntah pe merawa. E maka perlu kal rukur ras ertimbang arah kecibal ntah pe posisi kalak sideban.

I bas nembah ate ras mbenceng man Tuhan, ngaloi Dibata man Juna, alu nungkun 'bujur kin kam merawa?' Kai dalanna Juna merawa? La iakapna iergai dirina ras kai siilakokenna, erkiteken cian atena bangsa sideban e la kernep. Kerina e pelin-pelin keegoisen, sitik pe la lit ukur si mehuli, la meriah akapna natap kalak sideban mejuah-juah. Sedangken Dibata alu kerina biak-biakna si tangkas kal itandai Juna, icidahken Dibata maka keleng atena belinnen asangken nembah atena. Meriah kal ukur Dibata natap kalak perdosa jera.

Kita pe adi siukur-ukuri i bas kita pernah merawa subuk man anakta, perbulangen, temanta, sirenungken bujur kin kita merawa? Ntah megati ban la siangka nge, ban kurang komunikasi nge maka turah rawa ate. Bujur kin kita merawa man bana? Terlebih-lebih merawa man Dibata, bujur kin kita merawa? Lit kin asamta ngerawai Dibata, ise kin kita enda? Geluhta enda pe pemereNa nge? Rikutken penungkunen Dibata man Juna, penungkunen enda pe seh ka man banta. Alu ngerenungkenca, banci reh urakna rawa-rawata nandangi sekelewetta, labo kerina bagi siukurken kita si jadi. Sabap adi si pebelin rawanta, pinakitta ngenca tambah janah lanai ateta gedang geluh. E maka adi sanga merawa ateta sirenungkenlah, dengen sungkun pusuhtha 'bujur kin aku merawa?'

➤ Rembang tengah rukur erbahan kita la sukah merawa.